



Sel Prestuhn Thomas S. Monson

Tu ke Acn Muhtahl

Sramsram nuh sin Pahpah tuhmasr Inkuhsrao—weacng pruhe lasr nuh Sel ac mokleyuck Lal nuh sesr—oasr kuht in muh lain pahkah ac ma upac ke moul uh.

Tamuhlwel ac tahmtahel wiyuck an, kuht lohng pweng wolacna ke olutu se inge, ac nga kaksahkih kais sie mwet wi an. Kuht engan ke Elder Robert D. Hales el sulpac wi kuht ac puhla kwelac uh. Kuht luhngse kom, Bob.

Ke nga motko ma nga ke fahk nuh suwos olutu se inge, nga puhla pwackrihn luhk in akacsruhi ke kain ohiyac ac puhla ma nga nuhnkuh muh yohk srihpac ac fal. Nga pruhe tuh in kolyuck nga ke sramsram luhk uh.

Nga moul fin facluh ke yac 84 ingena. In usot in kahlwem kuhtuh, nga isuslac ke yac se na ma Charles Lindbergh el wucn aksohk soko ma mwet sefanna kac sohk suwohwohs som New York lac nuh Paris ke insin sefanna kac, mwe muhta sefanna weacng paho luo kac. Yohk ma eklac ke yac 84 ah me. Pacl na loeloes me nuh mihsenge ke mwet uh forfor nuh ke mahlwem ah ac fohlohk uh. Ke ma etweyuck, ma motkweyuck muh tiac pwacye mihsenge oruh ma pwacye. Ac ma pwacye ingacn, kuloh nuh sin insin in orekma ke pacl lasr uh, sa na eklac oruh kuht tiac arlac etwaclah—kuht fin ac kuh nuh kac.

Nuh sesr suc esam taclofon furohfohr sac ac mwe taip mahtuh sac, mihsenge insin in orekma uh wo liki na fwefwelac pwacye uh.

Atac nwacsnwacs luhn mwet uh sa pacna ekyek. Ohiyac ma suhfal ac koluk uh ingena tiac kaiyuck muhkwenah tuhsruhk oacyacpac mwet pucspucs falkihn.

Nga tuhfhahna ritweack ke *Wall Street Journal* pohloh fahk soko sel Jonathan Sacks, mwet luti fuhlwact se Britain ke alu luhn mwet Jew. Inmahsrloh kuhtuh pac ma sahyac uh, el sihmihis: “Ke ip luhn moul nwacsnwacs mwet nuh kwewa Rohto ke yac 1960 kuhtuh oasr eklac yohk se ke moul nwacsnwacs, sisilac luhn masap ma oreklac mwet uh in karuhnguhnwacng ohiyaclos. Ma nuh kwewa kom enenuh, onkihn Beatles, pa luhngse. Moul in nwacsnwacs luhn mwet Judeo ac mwe Kristin sisilac. Fahk pwengpweng soko ke pacl sac: *[Oruh] ma ac wo nuh sum an.* Masap Singucul ah ac sulpac sihmilac in sruhluhn ma Luhmweyucklac Singucul.”

Mwet luti Sacks el tahfwelah in auli in fahk lah:

“Kuht ingunyacr sislah ip yohk ke moul in nwacsnwacs lasr uh in oa ke kuht sislah wel mani lasr uh. . . .

“Acn pucspucs [facluh] ma muh alu ma mahtuh ac wacngihn kutongyacn nuhnac luhn facsin ma ahk-kweye mwet uh in moli ma puhs, sisi sacn, nukum nuknuk sahrromrom, ac fihlwacng ke srihpac kuht fal in oruh. Pweng sacn pa moul nwacsnwacs uh ma mahtuh, in moulkihn pa ma na luhn mwet muhnahs, ac masap yohk srihpac emet pa ‘Nik kom sokwack.’”¹

Tamuhlwel ac Tahmtahel wiyuck an, ma inge—koluk ohiyac—ahkuhtweyac yohk ke facluh se rauni-kuhtyak uh. Kuh kuht elyahkihn na pwacye ac motko lah kuht ac kuhtanglah fuhkah kain facluh se? Moh. Ma na pwacye, oasr ke moul lasr uh wosac luhn Jisus Kraist, ac kuht etuh lah moul nwacsnwacs uh tiac ma mahtuh, lah etuh lasr in kol kuht, ac mwactasr orekma lasr uh.

Facluh nwe eklac, masap luhn God srwackna oacyac ah. Wacngihn eklac kac; ac fah tiac eklac. Masap Singucul ac pa srwackna—masap uh. *Tiac* ma nuhnkweyuckyak se. Masap uh kwewa yohk srihpac mihsenge oacna ke God el sang nuh sin tuhlihk nuhtin Israel ah. Kuht fin ac lohng, kuht lohng lihkihn puhsrwen God, sramsram nuh sesr inge mihsenge:

“Nik kom eis siena god sahyuck.

“Nik kom oruh nuh sum kuhtwena ma srolwaclah. . . .

“Nik kom ahklusrohngtwenye inen Leum God lom. . . .

“Esamyac Iwen Sabbath, in ahkmuhtahlye. . . .

“Suhnakihn papa tomom ac ninac kiom. . . .

“Nik kom ahkmas.

“Nik kom kosro.

“Nik kom pihsrapasr.

“Nik kom kahskahs kikiacp. . . .

“Nik kom rahpkuh.”²

Ohiyacn oruh lasr uh pa in sruoh-kwacni; tiac ma ac motkweyuck se. Tiac sukokyak muhkwenā ke Masap Singucul tuhsruhk oasr pac ke Luti fin Eol uh, utuckuh nuh sesr sin Mwet Lahngo ke El luti fin facluh ah. Sukokyak ke luti Lal nuh kwewa. Sukokyak lun kahs ke fwackyuck mihsenge uh.

Pahpah tuhmasr Inkuhsrao El oacna ekweah, mihsenge ac nwe tok. Mwet pahluh Mormon el fahk nuh sesr lah God el ac tiac eklac nwe tok ma pahtpaht.”³ Ke facluh se inge ma apkuhran in ma nuh kwewa eklac uh, suwohswohs ke oruh Lal uh pa sie ma kuht kuh in luhlalhfongi, kawuck se ma kuht in kuh in sruokyac kuh ac wo, kuht in tiac pahltah nuh ke kof sensen.

E kuh in sikyak nuh sum ke pacl ma ma fin facluh pwacr liki na oruh lom an. Kuhtuh suwos kuh in puhla ikolyucki ke ohiyacn oruh ma oasr lasr ke Alu uh. Tamuhlwel ac tahmtahel wiyuck an, nga fahkoht nuh suwos, tuhsruhk, *wacngihn* ma kuh in use pwacr yohk nuh ke moul lasr uh kuh mihslac wo nuh ke nguha lasr uh liki na Nguhn ma tuhkuh nuh sesr ke kuht ukwe Mwet Lahngo ac karihngihn masap uh. Nguhn sac tiac kuh in wi ke kain mukwikwi ma facluh oruh yohk uh. Mwet Sap Paul el fahkwack ma pwacye: “Kuhtwena mwet suc Nguhn Muhtahl tiac oasr in el, el koflahna kahlwem kac; ma inge ma lahlfon nu sel, mweyen sacohkiyacn ma inge akihlenyuck ke nguhn muhkwenā.”⁴ Kahs se *kuhtwena mwet* kuh in fwack nuh sesr kuht fin lwelah kuht in oruh oacna.

Kuht enenuh in taranwacng oruh luhn facluh se ma facsin uh foracng yohk nuh kac liki ma luhn Nguhn Muhtahl. Yohk srihpac na pwacye kuht in kihsackuhnlah kuhtwena

ma tiac fal nuh ke akwuck wo lasr uh, tiac lwelah in fuhlweack ke ma kuht kena yohk: moul ma pahtpaht ke tohkohsrahi luhn God. Pahkah uh fah srackna puok sruhnguhl lasr uh ke pacl nuh ke pacl, tuh pa ip tiac kuh in wacngihnlac ke puhlahkihn lasr ke moul nwacsnwacs. Kuht pac, kuht ac fah ahkolah wo in orekma nuh kac, in etuh yohk kac, ac in kuhtanglah fin oasr wosawac yohrohsr in oruh pwelucng se ke moul lasr ac luhngse luhn Mwet Lahngo lun insiyacsr. Mwet Pahluh Isaiā el fahkwack, “Ke srihpen mwet nuhkwenā ac oruh ma suwohs, ac fah oasr mihslac ac wacngihn mwe sensen nwe tok.”⁵

In oruh in *liyaclosyang* facluh tuh in tiac *esacloslac* facluh, yohk srihpac kuht in sramsram nuh sin Pahpah tuhmasr Inkuhsrao ke pruhe. El ke kuht in oruh oacyac; El ac topuk pruhe lasr. Mwet Lahngo el muhlati kuht, oacna ke sihmilac ke 3 Nephi 18, in liye ac pruhe ke pacl nuh kwewa kuht in tiac sun mwe sruhlf, tuh Setuhn el ke eis kuht. . . .

Kuht enenuh in liye ac pruhe pacl nuh kwewa nuh sin Pahpah ke inek;

Ma nuh kwewa kuht siyuck sin Pahpah ke Inen Jisus Kraist, ke ma pwacye, luhlalhfongi lah kuht ac fah eis, ac fah utuckuh nuh sesr.”⁶

Nga eis fahkwack luhlalhfongi ke kuh luhn pruhe ke nga tuh matwac yac 12 ah. Nga kampare orekma in eis mani ac orwacalah sefiyac tala limekohsr. Ma e ke Pacl Upac ah, ke tala limekohsr tuh oruh luhpan mani luhlalhp se—yohk na nuh sin tuhlihk mukul matwac yac 12. Nga sang mani sacn ah nohfohn, ma orwacalah luhpan tala limekohsr, nuh sin pahpah tuhmuhk ah, ac el fohlohkohnma ke tala limekohsr ke pwepuh. Nga etuh lah oasr ma se nga plwacni in molwelah ke tala limekohsr sac, tuhsruhktuh nwe mihsenge nga tiac kuh in esam lah meac nga ke molwelah ah. Nga esam yohk srihpaciyacn mani sac nuh sihk.

Ke pacl sac wacngihn insin in owo lasr, na ninac kiyuck ah suhpwacalah

nuknuk lasr ma enenuh in owo nuh ke acn in owo ah ke kais sie wik. Lwen luō tohkoh, sie un nuknuk “owolac sroksrok” ah tuhkuh, Ninac lac sruhpuhsrwack ke ah in srihpsrihp nuknuk sac lukunum ac in paholah.

Nga isongyac tala limekohsr ah nuh ke pakiht in tangkihri se luhk ah. Oacna ke kom ac motko uh, tangkihri se luhk ah suhpweyucklac nuh ke acn in owo wi mani sac an na lun pakiht sac. Ke nga akihlen ma sikyak ah, nga maskuhnwack ke elyah uh. Nga etuh lah pakiht sac ahryahrlac koano ah met liki ac owo ah. Fin mani se luhk ah tiac sukokyak ac itucklac ke owo ah, Nga etuh na pwacye lah mani sac puhtatlac ke owo ah ac mwet se ma orekma ah ac sruhwack ac tiac etuh lah suc el ac fohlohkohnwacng nuh se, el fin ke fohlohkohnwacng. In sulpac eis tala limekohsr luhk ah wacngihn finsrak kac—ke ninac sacohk kiyuck ah ahkkweyacallah ke nga fahk lah mani sac oasr lun pakiht in tuhrasis luhk ah.

Nga luhngse mani sac; Nga enenuh mani sac; nga orekma upac in eis mani sac. Nga akihlen lah oasr ma se nga kuh in oruh. Ke kena upac luhk, nga foracng nuh sin Pahpah tuhmuhk Inkuhsrao ac ngihsre Sel lacn karuhnguhnwacng mani sac lun pakiht luhk ah nwe ke owo sroksrok lasr ah fohlohk.

Lwen na loeloes luō tohkoh, ke nga etuh lah pacl luhn stosah in wiwac owo sac use owo lasr ah, nga muhta siskacn winto ah sano. Ke stosah soko ah yucyak nuh ke kuhruh sac, insiyuck kihmkihm. Ke pacl se ma nuknuk sroksrok ah utuckuh nuh lun lohmi ah, nga sruhwack tuhrasis se luhk ah ac kahsruhsr nuh ke infuckihl luhk ah. Nga saplakyang nuh lun pakiht luhk ke paho rarrar uh. Ke nga tiac sa konwacack ah, nga pahngohn muh tuhlac. Na tohkihn pouk kahlyac tala limekohsr sroksrok sac. Ke nga olwack liki pakiht sac ah, mongi na upac se sunyuc. Nga oruh pruhe

ke inse pwacye ke tarilac nuh sin Pahpah tuhmuhk Inkuhsrao, tuh nga etuh lah El topuk pruhe luhk.

Ke pacl sac me pruhe pucspucs luhk topukyucklac. Tiac lwen se nga muhluhnlah in tiac sramsram nuh sin Leum ke pruhe. Akuhpahsri se nga luhngse yohk—sie ma ngwac tuhlac fin wacngihn akuhpahsri kac. Fin wacngihn ingena kain akuhpahsri se lom nuh sin Pahpah tomom Inkuhsrao, nga kwacfe suwos in orekma nuh ke finsrak sacn. Ke kowos ac oruh uh, kowos ac fah eis moklweyuck ac kolyuck Lal ke moul lowos an—ma enenweyuck nuh sin kais sie sesr kuht fin ke pain moullac ke ip luhn nguhn ke moul lasr inge facluh uh. Kain pihrihkyuck ac kolyuck se pa mwe sang ma El use ke wacngihn molo kuht fin suk muhkwenac kac. Ma ingacn pa mwe kahsrup yohk uh!

Nga puhsisac ac sruikihn pacl nuh kwewa ke Pahpah tuhmuhk Inkuhsrao el sramsram nuh sihk ke pihrihkyuck Lal. Nga etwacnah in akikhlen, in luhlalhfongi, ac in ukwe. Pacl pucspucs nga oruh mwet eis kain pihrihkyuck sacn. Sie puhlakihn fosrngah sikyack ke Ohkohs 1987 ke aluiyuck Tempuhl Frankfurt Germany. Prestuhn Ezra Taft Benson el wi kuht ke lwen se kuh luo emet ah ke aluiyuck sac tuhsruhke el fohlohk nuh lohmi sel ah, na oruh pacl wowo luhk in ahkfahsrye in ahksahfyelah tuhkweni sac.

Ke Sactte kuht oruh tuhkweni se nuh yurin mempucr Dutch ma oasr ke tistrik ke Tempuhl Frankfurt. Nga etuh wo sie mwet kol etuh lasr ah fin acn Netherlands, Tamuhlwel Peter Mourik. Met liki tuhkweni sac, oasr nuhnac kahlwem se luhk muh Tamuhlwel Peter Mourik el enenuh in siyuckyuck in sramsram nuh sin mwet wiyac Dutch ah ke tuhkweni sac ac lah, ke ma pwacye, el enenuh in sramsram emet. Nga tiac liyackwack lun tempuhl ke lututacng sac, nga suhmuhslah pwepuh se nuh sel Elder Carlos E. Asay, Prestuhn luhn Eria lasr ah, siyuck lah Peter Mourik

el oasr ke tuhkweni sac. Met liki ngwac tuyak in sramtweack tuhkweni sac, Elder Asay el suhmuhslah pwepuh se fahk lah Tamuhlwel Mourik el *wacngihn*, lah el kahfofo oasr sahyac, lah el plwacn in wi tuhkweni in aluiyuck ah ke lwen tok ah wi stek luhn solse ah.

Ke nga tulac ke acn in sramsram in pwacngwack nuh sin mwet ah ac in fahkwack prokracm sac, nga sifil pac eis pihrihkyuck tiac tahfonglac soko lah ngan ahkkahlwemye lah Peter Mourik lacn oruh mwet in sramsram se met. Ma se inge sie liki na ma nga etuh, ke nga tuhfhahna lohng sel Elder Asay lah Tamuhlwel Mourik el *wacngihn* lun tempuhl ah. Luhlalhfongi ke pihrihkyuck, tuhsruhktuh, nga ahkkahlwemye on luhn u in on, pruhe, na fahk lah mwet in sramsram se emet lasr uh pa Tamuhlwel Peter Mourik.

Ke nga fohlohk nuh ke siah luhk ah, sruhke muhtuhk nuh yohrohl Elder Asay ac liye ngwetngwet se lah ah tuhfal. El fahk tok lah ke nga ahkkahlwemye lah Tamuhlwel Mourik lac oruh mwet in sramsram se emet, el tiac luhlalhfongi insrac. El fahk lah el etuh lah nga eis pwepuh sac ac nga riti, ac el tiac etuh lah efuh kuh nga ahkkahlwemye lah Tamuhlwel Mourik lac oruh mwet in sramsram se, ke etweyuck lah el wacngihn lun tempuhl ah.

Ke pacl ma inge nuh kwewa oreklac ah, Peter Mourik el oasr ke miting se ke ohfohs luhn eria Porthstrasse ac. Ke miting sac srackna orek ah, el sana forwacng nuh sel Elder Hawkes, suc ma met oruh Aholyacn Alu, ac siyuck, “Fuhkah muhiyacn kahsrup lom an kom fin usyuclac nuh ke tempuhl?”

Elder Hawkes, suc etweyuck ke muhiyacn kahsrup la ke kihtin stosah in akuhtuhn okwacnah, topuk, “Nga kuh in siskomlac ke lusacn mihnit 10! Tuhsruhke efuh kuh kom enenuh in som nuh ke tempuhl?”

Tamuhlwel Mourik el fahk lah el tiac etuh lah efuh el enenuh in som nuh ke tempuhl tuhsruhke el etuh

lah el enenuh in sun acn we. Eltahl kwewa suhlahklahk som nuh ke tempuhl.

Ke on kahto luhn u in on ah, nga sruhke muhtuhk, nuhnkuh muh nga kuh in liyackwack Peter Mourik. Nga tiac liyack. Usrnguckiyac, tuhsruhktuh, nga tiac fosrngah. Nga puhla na pwacye lah ma nuh kwewa ac fah wona.

Tamuhlwel Mourik el utyak ke sruhnguhl ah falyang nuh ke pruhe in ikacslah sac tari ac, srwackna tiac etuh lah meac el ac som oruh ah. Ke el fahsr suhlahklahk nuh ke tuhkweni sac, el liye nguhtihk ke mwe sramsram sac ac lohng ke nga ahkkahlwemye ah, “Kuht ac fah inge lohng sel Tamuhlwel Peter Mourik.”

Ke pahngyak lah Elder Asay, Peter Mourik el suhlahklahk na utyak nuh lun rum sac ac tulac ke acn in sramsram sac.

Tukun tuhkweni sac, Nga ac Tamuhlwel Mourik sramsramkihn ma orek met liki pacl wowo lah in sramsram ah. Nga motko ke pihrihkyuck ma tuhkuh ke lwen sac tiac nuh sihk muhkwenac tuhsruhke oacyacpac nuh sel Tamuhlwel Mourik. Puhlakihn wolacna sac oruh loh ma tiac kuh in lahfwekihnyuck se nuh sihk ke yohk srihpaciyacn nwacs-nwacs in eis kain pihrihkyuck se ac luhlalhfongi kac—ac ukwe—ke ac tuhkuh uh. Nga etuh na pwacye lah Leum el oruh nuh selos suc wi ke tuhkweni in aluiyuck Tempuhl Frankfurt ah in lohng fahkwack luhlalhfongi kuh ac moklweyuck lah Tamuhlwel Peter Mourik mwet kuhlwacnsap Lal.

Tamuhlwel ac tahmtahel wolacna wiyuck an, sramsram nuh sin Pahpah tuhmasr Inkuhsrao—wacng pruhe lasr nuh Sel ac pihrihkyuck Lal nuh sesr—enenweyuck kuht in muh kuh in wihklac liki pahkah ac ma upac luhn moul uh. Leum El suli kuht in ahkfototo nuh yohrohl, ac El ac ahkfototo nuh yohrohsr. Kuht fin oaru in sokol, El ac suk kuhtyak.⁷ Ke kuht oruh oacna uh, kuht ac puhla Nguhn Lal ke moul lasr, use nuh sesr kena se ac puhlaik in tu kuh ac tiac mukwikwi

ke suwohswohs—in tu ke acn muhtahl ac tiac mukwilac.⁸

Ke facluh forlah uh ac ke atac se, kuht liye ip yohk ke moul nwacs-nwacs lun mwet uh muhnahtlah, kuht kuh in esam uli sacohk luhn Leum nuh selos suc luhlahlfongwel: “Nimet sahngweng; nga wi kowos! Nga God lowos: nimet lwelah kuht-wena ma in ahksahngwengye kowos. Nga fah kahsrwe kowos ac oruh kowos in kuh; Nga fah loange kowos ac moli kowos.”⁹

Sie olwelah na wowo! Lwelah kain ingacn in oruh mwe insewowo lasr, nga pruhe ke ine muhtahl luhn Leum ac Mwet Lahngo, Jisus Kraist, amen.

MWE KAHSRUH

1. Jonathan Sacks, “Reversing the Decay of London Undone,” *Wall Street Journal*, Ohkohs 20, 2011, online.wsj.com; ma sang kac. *Mwe kahsrüh*: Lord Sacks pa sifen mwet luti ke United Hebrew Congregations luhn Commonwealth.
2. Exodus 20:3–4, 7–8, 12–17.
3. Liye Moroni 8:18..
4. 1 Met Korint 2:14.
5. Isaiah 32:17.
6. Liye 3 Nephi 18:18–20.
7. Liye Doctrine and Covenants 88:63.
8. Liye Doctrine and Covenants 87:8.
9. Isaiah 41:10.

Luti ke Pacl Lasr uh

Lesin luhn Melchizedek Pristut ac U luhn Muhtwacn in Kahsrüh ke Sacnri ahkakhkosr uh tuhfeh orek ke “Teaching for Our Time.” Kais sie lesin kuh in ahkoeyucklac ke soko sramsram kuh in puhs liki ma orek ke toeni luhlahp ma tuhfehna tari ah (liye mwe kahsrüh sihmlac ten). Prestuhn luhn stek kuh tistrik kuh in sulacrah sramsram ma in orekmakihnyuck uh, kuh elos kuh in sang kunohkohn se inge nuh sel pisap ac prestuhn luhn pracns. Mwet kol uh enenuh in ahkkahlwemye yohk srihpaciyacn mukul ke Melchizedek Pristut ac tahmtahel ke U luhn Muhtwacn in Kahsrüh in lutlutkihn sramsram sacpacna ke Sacnri sacpacna.

Elos suc wi lesin ke Sacnri-ahkakhkosr ah ahkkweyeyuck in lutlutkihn ac use nuh ke kuhlahs mackuhsein ke toeni luhlahp ma tuhfehna orek uh.

Ma tohuyak nuh ke Ahkoeyacn Lesin se ke Sramsram uh

Pruhe tuh Nguhn Muhtahl fah wi kowos ke kowos e lutlutkihn ac luti sramsram uh. Kowos kuh

in srihfeyuck in orekmakihn kuhfa sahyac in ahko lesin an, tuhsruhk sramsram ke toeni uh pa ohiyacn luti se ma ahkkweyeyucklac uh. Kunohkohn lowos an pa in kahsrüh mwet sahyac in etuh ac moulkihn wosasuc uh ke lutiuyuck ke toeni luhlahp luhn Alu uh ma tuhfehna orek ah.

Sifil liye sramsram uh, liye ke ip yohk ac mwe luti ma sun enenuh luhn mwet ke kuhlahs an. Suk pac ke pohloh sramsram, ma kahlwem ke ma suhmuhslah, ac pohloh fahk ke sramsram uh ma ac fah kahsrwe kowos luti ma pwacye uh.

Orwacrah sie tahk an ke ohiyacn luti ke ip yohk ac mwe luti uh. Tahk lowos an enenuh in weacng kuhsen siyuck ma kahsrüh mwet ke kuhlahs an:

- Suk ke ip yohk ac mwe luti ke sramsram uh.
- Nuhnkuh ke kalmeyac lalos.
- Akacsruhi ke etuh, mwe nuhnak, ma puhlakihnyuck, ac fahkwack luhlahlfongi an.
- Orekmakihn ip yohk inge ac mwe luti ke moul lalos an.

LESIN KE MAHLWEM MA LUTUYUCK	KUHFA LUHN LESIN KE SACNRI-AHKAHKOSR
Nohfohmpuh 2011–Eprel 2012	Sramsram uh sihmlac ke Nohfohmpuh 2011 <i>Liahona</i> *
Mei 2012–Ohktohpä 2012	Sramsram uh sihmlac ke Mei 2012 <i>Liahona</i> *

*Sramsram uh oasr ke kahs pucspucs ke conference.lds.org.



Sel Prestuhn Dieter F. Uchtdorf

Mwet in Kahsruh Ahkluo ke Prestuhnsi Se Met

Kom Yohk Srihpac nuh Sel

Leum el orekmakihn sie mwe srihkasrak siena liki mwe paun luhn facluh ke nwacsnwacsiyacn sie nguhna.

Moses, sie sin mwet pahluh wolacna fin facluh ma etweyuck, tuhfweyucklac sin tuhlihk muhtwacn se nahtuhl Fero ac eis yac 40 met ke moul lal an lun lohm fuhlwact fin acn Egypt an. El puhlakihn met wolacna ac kahtoiyacn tohkohsrahi mahtuh se ingacn.

Yac ekahsr tohkoh, e lucng fin soko finohl loeslac, oan loeslac liki acn kahto ac wolacna fin acn Egypt fokoko, Moses el tu ye muhtuhn God ac sramsram nuh sel muhta nuh ke muhta oacna ke sie mukul sramsram nuh sin kawuck se lal.¹ Ke puhlan pacl in muhtwacta se ingacn, God el ahkkahlwemye nuh sel Moses orekma luhn Pahol, lwelah elan liye ma srihsrihk ke orekma ac wolacna Lal uh. Ke aruhrruhma sac tari ah, Moses el puhtatlac nuh infohk uh ke ao puhkantwen. Ke kuhiyacn fohlohk ah, el akihlen sie ma, ke yac nohfohn lal lun court lal Fero, tiacna sikyak nuh sel met.

“Nga etuh,” el fahk, “mukul sac wacngihn srihpac.”²

Kuht Srihk Likina Ma Kuht Nuhnkuh uh

Yohkiyacn lutlut lasr ke kuhsrao lucng, kuht ac kahlwem yohk—ke sie ip srihsrihk—ma Moses el etuh uh. Kuhsrao lucng el arulacna yohk, lukmac, ac wolacna oruh tiac kahlwem nuh ke nuhnak luhn mwet uh. “Facluh ma nga orwacnah sahyacn nempuh,” God el fahk nuh sel Moses.³ Ma wolacna ke inkuhsrao ke fong pa sie luhlahlfongi kahto ac pwacye.

Oasr kuhtuh ma ma nwekyuclac ke ma usrnguck wolacna ke nga sohksokh ke fong lohsr in meoa ac acn luhlalp uh ac liye ke kihtin winto luhk itu wolacna puhkantwen uh.

Mwet lutlut ke itu uh srihke in wacklah pihsen nempuh ke itu kuhsrao lucng uh. Sie un scientist nuhnkuh lah pihsen itu ma fal in liyeyuck ke tacluhsokp nahtuhsr uh el pacl 10 yohk likina ipin puhkpuhk nuh kwewa ke lihkihpot ac yen mwesis facluh uh.⁴

Nuhnak inge apkuhran in oacna mwe fahkwack lal mwet pahluh Enoch emet ah: “Yac kuh mwet

uh in wacklah ip nuh kwewa ke facluh, ahok, facluh puhkantwen oacna ma inge, ac tiac pa muhtwacwacackiyacn nempuh ke ma kom orwacnah uh.”⁵

Ke srihpen yohk ma God el orwacnah, kuht suk lah efuh Tohkohsrah Benjamin el sang kahsruh nuh sin mwet lal in “esam pacl nuh kwewa, wolacna luhn God, ac wacngihn lom sifacna uh.”⁶

Kuht Yohk Liki Ma Kuht Nuhnkuh uh

Tuhsruhk ne ohinge mwet uh wacngihn srihpac, nga sesseslah ke nuhnak ac wolacna in nuhnkuh lah “yohk srihpaciyacn nguhna uh yohk srihpac nuh ye muhtuhn God.”⁷

Ac ke kuht ac liye ma yohklacna ke kuhsrao lucng ac fahk, “Meac mwet uh kapsrweyuck nuh ke wolacna ma oreklac uh?” God Sifacna el fahk lah srihpacsr pa oruh El orwacnah kuhsrao lucng uh! Orekma ac wolacna Lal—srihpac nuh ke kuhsrao lucng wolacna se inge—pa in molwelah ac ahkfuhlwyacn mwet uh.⁸ Ke kahs sahyacn an, yohklacna luhn ma pahtpaht, wolacna ac ma lukmac ke acn ac pacl ma pahtpaht uh muhsahiyucklac nuh ke woiyacn mwet ma oacna kom ac nga uh. Pahpah tuhmasr Inkuhsrao el orwacnah kuhsrao tuh kuht in sun kuhiyacsr oacna tuhlihk mukul ac muhtwacn Nahtuhl uh.

Ma inge el ma siena luhn mwet uh: kapsra nuh sin God, mwet uh wacngihn; tuhsruhk kuht ma nuh kwewa nuh sin God. Kapsra nuh ke ma oreklac ma pahtpaht uh kuht oacna ma wacngihn uh, oasr sie e ma pahtpaht srihsrihk lun insiacsr. Oasr olwelah in ahkfuhlwyacn ma kuht koflah in kahlwem kac—facluh

wacngihn sahflahiyac—ma kuht kuh in eis. Ac pa ingacn kena luhn God in kahsrwe kuht sun.

Lahlfon ke Insefuhlhwact

Mwet kuhtasrihk sac etuh lah sie ohiyac wowo emet in kohllah tuhlihk nuhtin God in tuhla pa in sikyang yohk ke ma siena luhn mwet uh. Nuh sin kuhtuh, el sikyang nuh ke insefuhlhwact lalos, ahkyohkye nuhnkwaclos ac ahkkweyacos in luhlahlfongi ke ma yohk srihpac wolacna lalos sifacna ac koflah kuhtanglah uh. El fahk nuh selos lah elos ahlukwelah ma fal ac ke srihpen kuh, suwohs, kuh fuhlwactiyac, elos sriyucklac liki srihkasrak fal ke ma nuh kwewa raunweloslah uh. El kohlohlos in ahksahfye lah elos tiac kolyuck ke kuhtwena masap luhn mwet ac in tiac lusrongyuck ke elyah luhn kuhtwena mwet.

Abraham Lincoln el fahk lah in luhngse soko poem ma rit:

Efuh nguhnihn mwet uh enenuh in engan?

Oacna sie yot fol kahsrusru muhi, sie puhkuhnyeng sohk muhi, Sie sahr ke sahrum, sie puhtati luhn noa,

Mwet uh ahlukwelah moul uh nuh ke monglac lal lun kucl-yuck uh.⁹

Mwet tuhma lutlut luhn Jisus Kraist kahlwem lah in kapsrweyuck nuh ke moul ma pahtpaht, oasr lasr ke moul in mahno se inge el “sie pacl fototo” muhkwenah ke acn ac pacl.¹⁰ Elos etuh lah sie ma sacohk pwacye luhn mwet wacngihn srihpac nuh ke ma facluh sruok yohk srihpac uh. Elos etuh lah kom kuh in elohsack mani orekweni fin facluh nohfohn uh ac tiac kuh in molwelah sie ipin fuhlao lun acn in kuhka inkuhsrao.

Elos suc fah “usrui tohkohsrahi luhn God”¹¹ elos pa mwet eklac “oacna sie tuhlihk, ahkostwen, puhsisac, inse wo, mongfihsrwacs, sesseslah ke luhngse.”¹² “Tuh mwet nuh kwewa ma ahkyohkyacl sifacna fah inse wo; ac el suc sifacna ahkmongfihsrwacsryacl fah

ahkyohkyeyuck.”¹³ Kain mwet tuhma lutlut uh kahlwem pac “lah ke kowos kuhlhwacnsapuh mwet wiyowos an kowos sifacna kuhlhwacnsapuh God lowos.”¹⁴

Kuht Tiacna Muhlkihnyucklac

Sie pac inkacnek Setuhn el kiacpwekuhtlac kac pa ke tahfuh luo. El srihke in lohacng nuh ke kahlwem lasr ke tiac yohk srihpac lasr sifacna nuh ke kuht muhtwacwacack in tahfuh luo lah yohk srihpacs. El fahk nuh sesr lah kuht arulacna srihkclac nuh sin kuhtwena mwet in akikhlen, lah kuht muhlkihnyucklac—yohkna sin God.

Lwelah nga in akacsruhi nuh suwos sie puhla luhk sifacna ma ac kahsrh kuhtuh mwet ma puhla tiac yohk srihpac, muhlkihnyucklac, kuh muhkahimtacl an.

Yac pucspucs somlah ah nga wi ahkpah nuh ke mwet utuck aksohk ke United States Air Force. Nga loeslac liki lohmi sihk ah, sie solse fuhsr West Germany, isuslac fin acn Czechoslovakia, suc mahtuhlah fin acn East Germany ac upac in sramsram ke English. Nga srwackna esam kahsrusru luhk nuh ke acn in ahkpah se lasr fin acn Texas inge. Nga muhta lun soko oaksohk, muhta sissen sie pahsinse ma sramsram ke puhsren Mwet South. Nga koflah in kahlwem ke kahs el fahk an. Nga nuhnkuh fin tiac lutiyuck nga wo ke sramsram uh. Nga sahngweng in nuhnkuh lah nga enenuh in akuhtuhn nuh ke acn fuhlwact se emet ke ahkpah nuh ke mwet utuck oaksohk lain tuhlihk lutlut ma kahs English uh ma lalos uh.

Ke nga oai ke acn in oaksohk sac ke sie mura srihsrihk fin acn Big Spring, Texas, nga ngwetngwet liye ac sokwack pracns luhn Mwet Luhlahlfongi ke Lwen-sahflah uh, suc ma sesseslah ke mempucr ma ohsun lun infuckihl reniyuck ke acn in oaksohk an sifacna. Mempucr ingacn ahkolah in muhsahelah sie kihtin lohmi in miting ma ac kuhlhwacnsapweyuck yohk oacna sie acn nuh ke Alu uh. Ke pacl ingacn mempucr uh sang orekma yohk uh nuh ke muhsah sasuc uh.

Lwen nuh ke lwen nga wi ahkpah nuh ke utuck oaksohk uh ac lutlut upac ke kuhiyuck na eis pacl mwesahs luhk an in orekma ke lohmi in miting sasuc sac. E we nga lotwelah lah two-by-four soko el tiac step in tacn soko tuhsruhk sie ipin sahk. Nga lotwelah pac yohk srihpaciyac ke ohiyac in moullac luhn kuf luhlhp soko ke pouk uh ke patihk soko osra uh.

Nga eis pacl yohk in orekma ke lohmi in miting ma pracns prestuhn—suc pa pac sie mwet kol luti lasr ke oaksohk ah—ahkkahlwemye nuhnkalal lah sahp nga enenuh in eis pacl yohk in lutlut.

Kawuck ac tuhlihk lutlut utuck oaksohk wiyuck an ahkoeloslac sifacna nuh ke mukwikwi ke pacl mwesahs an, tuhsruhk nga nuhnkuh lah ac sef in fahk lah kuhtuh mukwikwi ingacn tiacna wo lah sruhmuhyuck lun puk srihsrihk ke *In Ahkkweye Mwet Fuhsr* mihsenge uh. Ke ip luhk kac an, nga engankihn in sie ip fokoko ke kihtin pracns Texas inge, rensui ohiyacn kamtuh sasuc luhk uh, ac ahkwoye kahs English luhk uh ke nga ahkfalye kunohkohn luhk in luti ke u luhn elder an ac ke Sacnri Skul uh.

Ke pacl sac, Big Spring, sahyacn na ine an, el sie acn srihk, tiac yohk srihpac, ac tiac etweyuck. Ac nga kwacna puhla ohiyac sacn pacna keik—tiac yohk srihpac, tiac etweyuck, ac muhkahimtacl. Ne ohingacn, tiacna pacl se nga nuhnkuh fin Leum el muhlkihnyucklac kuh fin El koflah in sukyucyak we. Nga etuh lah tiacna yohk srihpac sin Pahpah Lucng acn nga oasr we an, acn ma nga kol yurin mwet sahyac ke kuhlals oak sok in ahkpah luhk an, kuh meac pahng luhk ke Alu uh. Ma yohk srihpac nuh Sel emet an pa ngan oruh kuhiyuck nohfohn, tuh insiyuck in fototo nuh Sel, ac ngan kena in kahsrh mwet siskuck uh. Nga etuh lah fin nga oruh kuhiyuck, ma nuh kwewa fah wona.

Ac ma nuh kwewa wona.¹⁵

Mwet Etok Pa Ac Emet uh

Leum el tiacna elyah yohk kuht fin eis lwen lasr uh in orekma ke acn in

ramihne kuh acn in kaho uh. El etuh acn kuht oasr we uh, finne fuhkah mongfihsrwacsriyacn ohiyac lasr uh. El fah oruh—ke inkacnek Lal sifacna ac ke srihpac muhtahl Lal—mwet ma tulokihn insiaclos nuh Sel uh.

God el etuh lah kuhtuh sin nguhna wo emet ma moult paht uh pa mwet ma tiac oasr ke sramsram ke ma mahtuh uh. Elos nguhna ahkinsewowoyeyuck, mongfihsrwacsr ma ukwe srihkasrak luhn Mwet Lahngo ac eis lwen ke moult lalos in oruh ma wo uh.¹⁶

Sie sin siyacnyacn, pahpah ninac luhn kawuck se luhk, srihke ip yohk inge nuh sihk. Mukul sac orekma ke sie acn on orekma ke osra fin acn Utah. Ke pacl in mongo infuwacn lwen an el ac olwack ma suhmuhslah nahtuhl an kuh sie mackuhsin ke Alu uh ac riti. Ke mwet orekma sahyac ah ac liye ma inge uh, elos koasel ac lain luhlalfongi lal an. Pacl nuh kwewa elos oruh uh, el sramsram nuh selos ke kuhlwaeng ac luhlalfongi. El tiacna lwelah seahkfuhlwact lalos an in oruh el kasrkuhsrakwack kuh suhpwacrlac.

Yac tohkoh ah sie sin mwet isrwacsr upac ah masack na upac. Met liki el misac ah el siyuck mukul mongfihsrwacsr se inge in sramsram ke mas lal ah—suc ma el orwacalah.

Mwet yohk luhlalfongi la ke Alu uh wacngihn suhna la ke ohiyacn orekma kuh kahsrup uh, tuhsruh mokleyuck inge som yohkna nuh sin mwet nuh kwewa ma etwac uh. El misac ke sie ongaiyac ke muhsah ke el tui in kahsrup sie pac mwet in orekma suc muhwelacna ke snow uh.

Ke yac se katinmas ke kiyacn an enenuh in oruh laslas nuh ke brain uh, suc ma oruh el koflah in fahsr. Tuhsruh mwet uh luhngse in tuhkuh muhtwacta yohrohl ke srihpen el luhngse in lohng mwet uh. El esam pac. El nuhnkuh pac mwet uh. Ke koflah in sihm lal, el esamyac nempuh in tacluhfon luhn tuhlihk nah-tuhl ac tuhlihk nuhtin nahtuhl an. El esam pac puhtte ac anniversary an.

Mwet ma muhtwacta yohrohl an fohlohklac puhla wo ke moult uh ac kaclos sifacna. Elos puhla luhngse lal an. Elos etuh lah el luhngse. El tiacna tohrkahskahs kuh eis pacl lal in ahkinsewowoye moult luhn mwet sahyac an. Sie sin kawuck lal an fahk lah muhtwacn se inge pa sie sin kuhtuh mwet ma el etuh ma ahkkahlwemye na pwacye luhngse ac moult luhn Jisus Kraist uh.

Siyacnyacn se inge ma mwet emet in fahk lah elos tiac yohk srihpac nu ke facluh se inge. Tuhsruh Leum el orekmakihn siena mwe srihkasrak ke mwe paun luhn facluh yohk srihpaciyacn sie nguhna. El etuh siyacnyacn yohk luhlalfongi se inge; El luhngse eltahl. Mukwikwi lalos uh sie moult in mwe lohoh ke luhlalfongi fokoko lalos Kacl.

Kowos Yohk Srihpac nuh Sel

Tamuhlwel ac tahmtahel an, sahp pwacye lah mwet uh wacngihn in kapsrweyuck nuh ke wolacna luhn ma kuhsrao uh. Ke kuhtuh pack uh kuht ac kuh in puhla tiac yohk srihpac, wacngihn, muhkahimtacl, kuh muhkihnyucklac. Tuhsruhkuh esam lwen nuh kwewa—kowos yohk srihpac nuh Sel! Kom fin tahfuh luo, esam ip yohk wolacna ahkosr inge:

Ma se met, God el luhngse mwet mongfihsrwacsr ac puhsisac, tuh elos pa “yohk emet ke tohkohsrah inkuhsrao uh.”¹⁷

Ahkluo, Leum el sang “fohnlah luhn wosasuc [Lal] [in] sruhmuhnyuck sin mwet muhnahs ac fihsrwacsr nuh ke sahflahiyacn facluh.”¹⁸ El sulacalah “ma muhnahs luhn facluh [in] sikme ac kuhnahoslah mwet kuh ac fokoko uh”¹⁹ ac in ahkkolukye “ma ma fokoko uh.”²⁰

Ahktolu, kom finne muhta oyac, finne fuhkah ohiyacn puhsisacliyom, suhkahsruphiyacn orekma lom an, luhpan kuhiyom, atac fal ke ngwetngwetom, kuh luhpan srihkeyacn pahng lom nuh ke Alu uh, kowos tiacna wacngihn nuh sin

Pahpah tuhmowos Inkuhsrao. El luhngse kowos. El etuh inse puhsisac lowos ac orekma ac kuhlwaeng ke luhngse lowos. Nohfohnna, elos orwacalah sie fahkwack luhlalfongi wacngihn sahflahiyac ke oaru ac luhlalfongi lowos an.

Ahkahkosr ac sahflah, nuhnak muhnahs kahlwem kac lah ma kom liye ac puhlakihn ingena uh ac tiac ma pahtpaht se. Kowos ac tiac puhla muhkahimtacl, ahsor, ngal, kuh tahfuh luo ma pahtpaht. Oasr olwelah yohk luhlalfongi lasr sin God ma El fah kwewana muhkuhnlah kuh tiac esam elos suc tulokihn insiaclos nuh Sel.²¹ Oruh in oasr finsrak ac luhlalfongi ke olwelah sacn. Luti in luhngse Pahpah tomom Inkuhsrao ac eklac mwet tuhma lutlut Lal ke kahs ac orekma.

Oruh in kahlwem lah fin kowos tuna kuh, luhlalfongi in El, ac muhta na in luhlalfongi yohk ke liyacacng masap uh, sie lwen kowos fah puhlakihn suwos sifacna olwelah ma palyeyuck sel Mwet Sap Paul ah: “Muhta na tiac liye, kuh insroac ma tiac lohng, kwewana ac utyak nuh lun insiacn mwet uh, ma ma God el ahkolah nuh selos suc luhngsel.”²²

Tamuhlwel ac tahmtahel an, Mwet se ma fokoko emet kuhsrao lucng uh pa Pahpah tuhmwacn nguhnuwos. El etwekows. El luhngse kowos ke sie luhngse na suwohs.

God el liye kowos tiac sie luhman mwet muhkwenah fin sie facl srihsrihk suc muhta ke sie puhlan pacl fototo na—El liye kowos oacna tuhlihk Nahtuhl. El liye kowos oacna atacn mwet se kom an ma kuh in oruh ac kena in eklac. El luhngse kowos in etuh lah yohk srihpowos nuh Sel.

Lwelah kuht in luhlalfongi, etuh, ac tahkuhnlah moult lasr kuht in muhkuh in kahlwem ma yohk srihpac ma pahtpaht ac kuh pwacye lasr uh. Lwelah kuht in suwohswohs nuh ke mwe inewowo sacohk ma Pahpah Lucng el ahkolah nuh sesr pa mwe pruhe luhk ke inen Wen Nahtuhl, finne Jisus Kraist, amen.

MWE KAHSRUH

1. Liye Moses 1:2.
2. Liye Moses 1:10.
3. Liye Moses 1:33.
4. Liye Andrew Craig, "Astronomers count the stars," BBC News, Julaha 22, 2003, <http://news.bbc.co.uk/2/hi/science/nature/3085885.stm>.
5. Liye Mosiah 7:30.
6. Liye Mosiah 4:11.
7. Liye Doctrine and Covenants 18:10.
8. Liye Moses 1:38–39.
9. William Knox, "Mortality," ke James Dalton Morrison, ed., *Masterpieces of Religious Verse* (1948), 397.
10. Liye Doctrine and Covenants 121:7.
11. Liye 3 Nephi 11:38.
12. Liye Mosiah 3:19.
13. Luk 18:14; liye pac fuhs 9–13.
14. Liye Mosiah 2:17.
15. Dieter F. Uchtdorf el ahksahfye emet ke kuhlahs lal ah.
16. Liye Orekma 10:38.
17. Mattu 18:4; liye pac fuhs 1–3.
18. Liye Doctrine and Covenants 1:23.
19. Liye Doctrine and Covenants 1:19.
20. 1 Met Korint 1:27.
21. Liye Met Hebrew 13:5.
22. 1 Met Korint 2:9.